

Chidziwitso: Alimi Ayenera Kudziwa za Matenda a Chitopa ndi Katemera wa I-2

Chitopa ndi matenda oopysa zedi, amene akhoza kupewedwa pogwiritsa ntchito katemera wa I-2. Katemerayu amapezeka ku Central Veterinary Laboratory ku Lilongwe, ku ma veterinary shops, kapena kwa alangizi a boma. Katemerayu aperekedwe pakatha miyezi inayi iliyonse.

Palibe mankhwala ochiza chitopa. Chikafika chitopa pa mudzi, nkhuu zambiri zimafa, pokhapokha ngati zinalandirapo katemera kale.


Katemera sachiza chitopa, koma amatchinjiriza chitopa ku nkhuu zathu ndi kuzipatsa chitetezo asanabwere matendawa kwathu.

Katemera sagwira ntchito nthawi yomweyo. Chitetezo chimabwera pang'onopang'ono kufikira sabata, ndipo chimapitirira kuteteza nkhuu kwa miyezi inayi.

Alimi asamadikire chitopa chifike. Chifukwa akatero nkhuu zawo zidzafabe zambiri pokhapokha ngati zinalandirapo kale katemera.

Alangizi a ku midzi asapereke katemera ku nkhuu zodwala. Ngati nkhuu zikudwala, thupi lake limakhala lofooka, ndiye katemera sangathe kugwira ntchito bwino m'thupi lofooka. Ndiye nkhuu zimafabe. Ngati atemera nkhuu zodwala ndi kufa mlimi adzataya chikhulupiliro kwa alangizi. Pazifukwa izi alangizi aja asapereke katemera ku nkhuu zodwala.

Alimi adziwe kuti katemera wa chitopa ndi wa nkhuu iliyonse yaing'ono kapena yaikulu. Ngati katemera angaperekedwe kwa nkhuu zochepa, zotsalazo zifabe.



Chizindikiro cha botolo la katemera chimaoneka chonchi:

Central Veterinary Laboratory Mw
I-2 Newcastle Disease Live Vaccine
300 doses Store at 4-8°C
Administer by eye drop
Batch No. 000 Exp Date: 00/0000
For animal use only

Onetsetsani kuti botolo silinatsegulidwe kale. Komanso werengeni bwino tsiku lotha ntchito la katemerayu.